

太常因革禮(四)
太常因革禮校識



太常因革禮

(四)

歐陽修等奉敕編

中華民國二十五年六月初版

編者 歐陽修等

校識者 廖廷相

發行人 王雲五
上海河南路

印刷所 商務印書館
上海河南路

發行所 商務印書館
上海及各埠

(本書校對者楊靜齋)

王雲五主編
叢書集成初編
太常因革禮及校識
四冊

太常因革禮卷九十二

廟議四

伯祖昭穆異同議下

昭憲皇后杜氏宣祖

伯祖昭穆異同議下

國朝會要咸平元年四月都省集羣臣上言曰伏以英武聖文神德皇帝受天明命開國承家恢復土疆撫寧億兆固已爲皇宋帝者太祖矣神功聖德文武皇帝續承大寶臨御四方混一寰區交修禮樂固已爲皇宋帝者太宗矣古者祖有功宗有德皆有其實而後正其名今二聖相承功業固已高矣諡號固已定矣謂之太祖太宗則百世不祧之廟矣豈有祖宗之廟已分二世昭穆之位翻同一代其所以如此者由兄弟繼統故爾若如前議引漢書云禮爲人後者爲之子以正父子之道以定昭穆之義則至公而無疑也必若以兄弟相繼同爲一代則是太宗不得自爲世數也不得自爲世數則何以得爲宗乎不得爲宗則何以得爲百世不祧之主乎不爲百世不祧之主則巍巍聖功于此盡矣爲人臣者其得已乎又據春秋正義禮父子異昭穆兄弟昭穆同此蓋論魯國諸侯之事但言兄弟昭穆同亦不言昭穆不可異此又不可爲證也臣等詳案下又云若兄弟相代則異昭穆設令兄弟四人皆立爲君則祖父之廟卽以從

毀。故先儒無作此說。據此是先儒慮魯諸侯之國。五廟之中。忽增四世。則祖父之廟毀矣。安得以此爲聖朝比哉。當今太祖爲開基之祖。太宗爲繼統之君。二帝相承。僖祖以降。四廟爲六世。以六世一昭一穆言之。則上無毀廟之嫌。下有善繼之美。于禮爲大順。于時爲合宜。何嫌而謂不可乎。又云。魯之隱桓閔僖。晉之惠懷。商之陽甲小乙。唐之中睿敬文武等。皆兄弟繼統。同爲一代。以此比方。彌謂天壤何者。擬人必于其倫。故臣謂前代興王立功業者。則有之。如太祖太宗兄弟開基繼統。則未之有也。豈宜以百世不祧之廟。翻不得自爲世數而同位異坐者乎。又云。太祖室。請依唐德宗在位故事。曰。皇伯考。案唐自玄宗至德宗。皆父子相傳。無兄弟繼及。德宗在位。何得有皇伯考乎。臣等又詳故事。宜爲昭穆者。有先朝之旨四焉。嗣位之初。制曰。承理命而莫獲。因辭言理命者。以古觀之。則柩前卽位也。非父子之義而何。此宜爲昭穆一也。喪紀之日。特以日易月。二十七日而終。是君臣父子之服。此又宜爲昭穆二也。嗣位逾年未聽樂。百官表請。詔答云。其如不德。夙奉先皇。人雖謂爲天倫。我實均于父事。此又宜爲昭穆三也。郊天之際。皆以太祖配焉。旣以配天。則嚴父之謂。此又宜爲昭穆四也。有先朝之旨四。制詔具在。皆可覆詳。蓋當時有司不能欽承行之。所以因循至于今日。因而正之。於禮爲順。一則不違先旨。一則久合舊經。亦足以上報先朝萬分之一也。翰林學士中書舍人宋湜等上言。伏以百王之制。以功德爲祖宗。七廟之中。以父子爲昭穆。聖賢垂範。典禮具存。恭維太宗。以上聖之資。繼下武之運。聖德大業。垂于無窮。百代不遷。蓋其宜矣。然令定昭穆之位。則太祖皇帝之弟也。竊詳三代而下。至于唐朝。兄弟相繼。則多。昭穆異位。未之見也。況古

之鴻儒。賀循、溫嶠之徒。議其事者甚衆。歷代遵守。以爲定規。今詳所議。皇帝有事于太祖廟室。稱孝孫。凡此二事。臣竊疑焉。欲望重下有司。審加詳定。如前代帝王有兄弟相繼而昭穆異位。及天子于伯父有稱孝孫者。卽依據遵行。如其不然。則望并依歷代之議。庶無差失。詔宜令太常禮院詳都省及兩制所議。再檢討典故以聞。禮院言。案禮記祭統曰。祭有昭穆者。所以別父子遠近長幼親疏之序而無亂也。公羊傳。公孫嬰齊爲兄歸父之後。春秋謂之仲嬰齊。何休云。弟無有父兄之義。爲亂昭穆之序。失父子之親。故不言仲孫。明不以子爲父孫。開寶通禮義纂云。父爲昭。居上。子爲穆。居下。父子異位。以崇本也。孫以祖例。遞爲昭穆。斯則長幼之節。親疏之序。得而正之。明上下也。晉賀循議。兄弟不合繼位。昭穆云。商人六廟。親廟四。并契而爲六。比有兄弟四人。相襲爲君者。便當上毀四廟乎。如此。四代之親盡。無復祖禰之神矣。又商紀成湯爲君。合十二代。而正代唯六。易乾鑿度曰。帝乙、六代王也。以此言之。明兄弟不爲正代也。溫嶠議。兄弟相繼。藏主室之事云。若以一帝爲一代。則當不得祭於禰。反不及庶人之祭也。夫兄弟同代。于恩旣順。于義無否。案通典玄宗廟祔祫儀。布昭穆之座於戶外。自西序以東。皇八代祖獻祖皇帝。六代祖太祖景皇帝。皇高祖神堯皇帝。皇祖高宗天皇帝。座皆北廂。南面。以上昭位。皇七代祖懿祖光皇帝。皇五代祖元皇帝。皇曾祖太宗文武皇帝。皇伯考中宗孝和皇帝。皇考睿宗大聖真皇帝。座于南廂。北向。以上穆位。其弟相及。同列此位。又唐郊祀錄。德宗廟祀。以中宗爲高伯祖。續曲臺禮云。正元十九年。給事中陳京議。祫祭圖中宗、睿宗俱列昭位。戶部尙書王紹等五十六人同陳京議。始與禮合。詔從之。晉王導、荀崧等議曰。禮。大宗

無子。則立支子。又曰。爲人後者爲之子。無兄弟相爲後之文。所以舍至親取遠屬者。蓋以兄弟一體。無父子之道故也。竊以七廟之制。百王是尊。至于祖有功。宗有德。百世不遷之廟也。父爲昭。子爲穆。則萬世不刊之典也。今議者引漢書曰。爲人後者爲之子。又曰。案德宗廟有伯氏之稱。自今皇帝有事于太廟。則太祖室稱孝孫。如此。則是以太宗爲太祖之後也。殊不知弟不爲兄後。子不爲父孫。春秋之深旨也。父謂之昭。子謂之穆。禮記明文也。況復稽賀循溫嶠之格言。考王導荀崧之通論。則爲人後之說。豈可施之于先帝乎。臣等又案。太宗饗祀太祖二十有二載。稱曰孝弟。此前朝不易之制。又安可追改乎。昔者唐玄宗謂中宗爲皇伯考。德宗謂中宗爲高伯祖。則伯氏之稱。復何不可。臣等參詳。請自今合祭日。太宗與太祖依典禮同位異座。皇帝于太祖位。仍舊稱孝子。餘遵舊制。則祖宗之烈。克播于無疆。昭穆之儀。適遵于前典。詔可。

昭憲皇后杜氏宣祖

禮閣新編。建隆二年六月二十三日。敕太常少卿馬吉奏。奉敕差撰大行皇太后諡號者。臣聞諡所以知行。號所以表功。功大者播之無窮。德厚者傳之不朽。唯詩人之詠。本王化之基。姜嫄發后稷之祥。太姒興武王之業。祖宗之慶。今古相沿。伏惟皇帝陛下。應天順人。變家爲國。謳歌獄訟。不召而自來。文物聲名。無遠而不至。尙猶翼翼持心而御極。蒸蒸盡孝以奉親。孰謂軒宮。條兮掩耀。詎期玄圃。寂而凝神。恭惟大行皇太后。沙麓儲靈。塗山孕粹。覆玉衣而表異。德叶休祥。獻瑤爵以致誠。務崇嚴潔。恢張陰教。表正人倫。化

九土而孝莫大焉。法六宮而禮無違者。事光史冊。美溢椒塗。方垂訓于照臨。何厭世于頃刻。緯衣綸翟。俄成原廟之遊。蜺輅龍輶。將祔霜陵之寢。葬期定諡。斯曰舊章。謹案諡法云。照臨四方曰明。聖善周達曰憲。請上尊諡曰明憲皇太后。伏以非諡無以彰其迹。非號無以尊其名。大行皇太后。其爲母也。鍾帝堯之文思。言必有章。動皆合禮。得不謂明乎。其爲后也。宗老氏之清靜。慈以臨下。儉以居中。得不謂憲乎。積是懿範。流爲頌聲。下臣不才。撰論無取。仰奉易名之典。但懷供職之憂。謹具奏聞。恭依典禮。禮閣新編。乾德二年正月。吏部尙書張昭奏。竊覽前代諸史。自漢魏已降。凡追諡帝后。皆取帝諡冠上一字。蓋古者婦人不專諡。取夫諡表之而已。竊見國家追崇四親廟。自翼祖皇帝以上三廟。其諡皆然。獨宣祖明憲皇后之諡。異乎三廟。將來遷祔玉冊。欲乞改諡曰昭憲。仍乞差改題神主官。祝文。翰林院修撰。有司用香幣酒脯禮料。遍告太廟四室。以明聖人不敢專擅之意。詔可。二十九日。敕太常禮院狀。準敕。宗正寺申昭憲皇后神主元題諡號。合從改正。二月七日。太常禮院言。準宗正寺牒。今檢會要。唐開元六年正月。太常奏。昭成皇太后諡號。已牒禮部。禮部以太字非便。太常報曰。入廟稱后。義繫于夫。在廟稱太后。義繫于子。此并載在史策。垂之不刊。今百司入牒奏狀。參詳典故。恐不合除太字。如諡冊入陵。神主入廟。卽當去太字。奏可。又云。大中三年十二月。詔曰。太常博士李稠所進狀。言追尊順宗憲宗諡號。禮官請別造神主。及改題事。請集通儒詳定。宜令都省集議聞奏。議曰。以臣等所議。當以新諡典冊告于陵。正得其宜。神主不改造。不重題。爲得禮。中書門下上言。改造改題。并無所據。酌情順理。題則爲宜。況今士族之家。通行此例。雖尊卑

有異。而情理則同。乞就神主改題爲允。詔可。

太常因革禮卷九十三

廟議五

孝惠皇后賀氏太祖

孝明皇后王氏

孝章皇后宋氏

孝惠皇后賀氏

禮閣新編建隆三年四月二十五日太常禮院奏準敕故會稽郡夫人賀氏可追冊皇后仍令所司擇日備禮冊命者準禮例差官定諡號太常少卿馮吉撰諡曰孝惠止就陵所置祠殿奉安神主不行四時薦享之禮不設牙盤祭器四時惟設食祭奠

孝明皇后王氏

國朝會要乾德元年十一月孝明皇后崩始詔有司議置后廟詳定殿室之制及孝惠孝明二后先后之次太常博士和峴奏議曰案唐睿宗追諡劉氏爲肅明皇后又追諡竇氏爲昭成皇后同于親仁里立廟名曰儀坤廟四時享祀皆準太廟禮詳此止有二后同廟之文卽無各殿異室之說況太廟四室同爲一殿今孝惠孝明並建別廟亦宜共殿別室恭惟孝明皇后早位內朝母儀天下伏請居上室孝惠皇后緣

是追尊止就陵所置祠。今若同祔別廟，宜居次室，仍依太廟例，以西爲上。詔可。禮閣新編：乾德元年十月二十五日，太常卿邊先範奏奉敕定大行皇后諡號者，歷觀彤史，眇覲皇閨，咸推中饋之賢，以輔興邦之運。塗山之隆有夏，姜嫄之王宗周。雖婉孌于椒塗，能經綸于草昧。其或烏蟾缺耀，舟壑遽移，長秋之官屬仍存，闕翟之徽容永闕，得不望北郊而灑涕，臨南面而不怡。將據黃屋之情，惟獻曲臺之諡。恭以大行皇后瑤圖襲慶，星婺降祥，生知陰教之文，宿植坤儀之道。爰自嬪于朱邸，瑞我皇家，望雲預識于勃興，求劍偏鍾于聖念。暨化家爲國，類帝禋宗，十四位之嬪嬙，皆師禮法，五千言之道德，刻意薰修，纔踰笄總之妙齡，已類蓍龜之道鑒。恩賢諫宇，昌言過補，衰之臣長樂深宮，視膳盡先姑之禮，永言福履，何止期頤。胡天道之混同，繆人倫之報應。祿壇告慶，俄成柘館之悲；桂魄沈暉，無復竹宮之楫。九有悽酸于中壺，六宮號噎于內朝。方士帳中，寂歷之香魂不返；甘泉壁上，□坐之畫像空存。何殫當中之懷，但擬易名之典。謹案諡法：法度明大曰章，慈和徧服曰順。請諡曰章順皇后。詔可。據國朝會要：尋改諡孝明。國朝會要：乾德二年正月七日，太常禮院狀謹案唐會要：元和十一年三月，順宗皇后王氏崩，諡曰莊憲。初，太常少卿韋纁進諡議，公卿書定，欲告天地宗廟。太常禮院奏議曰：謹案曾子問：賤不誄貴，幼不誄長，禮也。古者皇后之諡，則讀于廟。江都集禮引白虎通曰：后夫人于何所諡之？諡之于廟。又曰：婦人本無外事，何爲于郊也？所以必諡于廟者，諡宜受成于祖宗，故皇后諡成于廟。今請準禮集百官連書議狀，訖讀于太廟，然後上諡于兩儀殿。既符故事，允合禮經。從之。奉敕：宜令尙書省集官議定以聞。其後改卜安陵，禮儀使奏：孝惠皇后，孝

明皇后諡冊。請讀于太廟。然後上諡于兩儀殿。既符故事。允合禮經。敕令尙書省集官議定。聞奏者。諡案白虎通。后夫人于何所諡。諡之于廟。諡之。臣子共定。諡白之于君。然後加之。婦人天夫。故但有君而已。又唐會要。元和十一年三月。順宗皇后王氏崩。諡曰莊憲。案本紀。是順宗之后。憲宗之母。其禮官遂引賤不誄。貴幼不誄。長之文。又云。古者皇后之諡。則讀之于廟。言受成于祖宗也。今詳后夫人者。有太后也。有皇后也。若不尊卑異制。終恐禮意未然。今欲請凡母后之諡。則定于廟而讀之。受成于祖宗。乃合賤不誄。貴幼不誄。長之意。皇后之諡。取天夫之義。自君之命可也。今請孝明皇后。孝惠皇后。諡號。百官議定制下後。行冊之前。只差官告太廟。告訖。上于靈座上。況與周朝宣懿皇后禮例並同。于義稍允。詔可。國朝會要。乾德三年二月。太常禮院準少府監牒。別廟神門立戟。準周朝宣懿皇后廟例。立門戟七十二支。今來孝明孝惠等廟神門立戟。未審可否。禮官言。廟禮皆南垣一屋三門。東垣一屋一門。每門各二十四戟。況今別廟祀事。一準太廟之制。至于立戟。豈有異同。宜準令文所有施行。詔可。國朝會要。太平興國元年十月。太常禮院上言。太祖皇帝山陵禮畢。神主祔廟。孝明孝惠二后。合奉一后配食。謹案。唐睿宗肅明昭成二后。並享于儀坤廟。至睿宗。獨昭成以帝母之重。升配太廟。肅明止享于儀坤。近代周世宗正惠宣懿二后。并先崩。正惠元無位號。宣懿居長秋之位。其後禮官集議。以宣懿配食。今孝明孝惠二后。伏望將來以孝明皇后配享。忌日行者廢務。其孝惠皇后。享于別廟。詔可。

孝章皇后宋氏

禮閣新編至道元年四月孝章皇后宋氏崩翰林學士承旨禮部侍郎知制誥宋白奏奉敕差定開寶皇后諡號者臣聞后妃之德王化所基詩曰以御家邦禮云以聽內治統六宮而立教叶兩曜以齊明嬀汭嬪虞光啓重華之運塗山翼夏遂成文命之功昭示母儀流芳女史輔佐之美圖牒彰聞恭惟開寶皇后柔順利貞肅雍逮下挺生公族號金穴以承家作配先朝覆玉衣而表異彤庭鉛砌不移儉約之心織室蠶宮每盡躬親之禮夫何景靈不祐六氣生災疾有加而無瘳壽降年而不永奄辭椒披悲動璇宮今皇帝追感天倫愴懷壺則輟紫宸之朝謁御素服而發哀爰命禮官俾旌懿範下臣奉詔敢揚徽烈諡者行之迹號者功之表節以一惠諡以尊名將符善行之祥宜舉易名之典謹案諡法慈愛忘勞曰孝溫克令儀曰章伏請諡曰孝章皇后敕令尙書省集官議定開寶皇后諡號者臣等聞宮闈秉陰教于是合德先天天諡號益尊名所以流芳厚載稽乎大典昭彼無私恭以開寶皇后沙麓儲祥玉龜表慶輔佐先帝功勤內朝六宮仰和順之規千載決會昌之運濯龍視誠外戚屏如水之車蹈虎同寅永巷無脫簪之諫主上仁深睦族情厚陟岡椒塗之遐壽未登桂御之上仙何速聖情追悼皇族悲涼乃詢秩禮之臣爰舉易名之典經云莫大於孝允居百行之先詩曰爲章于天曾配二儀之廣兼是徽稱克揚柔明所諡孝章請尊彝式詔可國朝會要乾德二年二月二日祔享后廟初有司言孝章皇后爰在先朝母儀天下宜居上室孝惠皇后止是追崇宜居其次詔孝章殿室宜處孝惠之上

太常因革禮卷九十四

廟議六

淑德皇后尹氏太宗

元德皇后李氏

淑德皇后尹氏

懿德皇后符氏

禮閣新編太平興國二年正月十三日。敕故越國夫人符氏。故夫人天水尹氏。並追封冊皇后。仍命所司擇日備禮冊命。二月八日。禮院奏。伏準近朝周廣順元年九月中。追冊皇后柴氏。顯德四年。追冊皇后劉氏。并不行冊禮。建隆元年四月中。追冊皇后賀氏。亦不行冊禮。今來冊禮行不行。繫自朝旨。詔依建隆三年故事。尋差太常少卿張永錫撰諡號陵名。及本廟樂章舞名。永錫奏。追冊后諡號者。臣聞王者悼往推恩。緣情制禮。旌椒蘭之懿行。舉圖史之舊章。所以賁英魂于九泉。傳美名于千古。伏以故越國夫人符氏。瑤源析派。璧月騰輝。素彰柔順之風。允著肅雍之德。用慈惠而接物。服澣濯以修身。昔當偕耀之辰。克叶和鳴之兆。不登遐壽。奄謝明時。伏以故夫人尹氏。婉淑自持。賢明罕對。本三從之善訓。備四德之柔儀。作嬪逮事于皇親。率禮無違于母教。著女工于絲枲。奉主祭于蘋蘩。柏城之邱隴堪傷。蓬島之音容永隔。今者皇帝陛下。統臨辰極。纂嗣皇圖。推至仁而澤被九原。敷大化而恩覃萬國。念深內則。情切中宮。感歲月

之屢遷。歎松楸而已。拱宸襟軫悼。睿澤汪洋。爰命有司。舉茲彝典。謹案諡法云。溫柔聖善曰懿。言行不回曰淑。富貴好禮曰德。伏請上故越國夫人諡號爲懿德皇后。上故夫人尹氏諡號爲淑德皇后。詔可。是年三月二十二日。永錫又奏。二廟登歌酌獻樂章曲名者。伏以懿德皇后符氏。稟秀王室。推華女宗。閨房鳴玉佩之音。藩邸識彤雲之瑞。智推敏洽。性稟柔和。未陳辭輦之言。已軫藏舟之歎。清芬歿而可尙。懿德遠而彌彰。旣修追諡之文。允協飾終之典。笙竽在列。籩豆斯陳。登歌式薦于明靈。作樂以揚于盛美。酌獻請奏順安之曲。樂章詞云。玉門稟慶。帝族推賢。柔慈內備。和順外宣。流芳金石。著美簡編。登歌配享。不亦宜然。伏以淑德皇后尹氏。辭旨溫恭。禮容閑雅。戚里咸師。于懿範。閨闈夙著。于柔儀。方資中饋之賢。遽軫逝川之歎。一辭聖日。久閉泉扃。定諡追榮。式遵于茂典。登歌薦廟。宜舉于懿章。酌獻請奏嘉安之曲。樂章詞云。明明英媛。德備椒房。言容婉婉。禮法昭彰。閨闈作則。史冊垂芳。終溫且惠。播美無疆。詔可。禮閣新編。淳化元年四月二十六日。太常禮院奏。準敕下宗正少卿趙安易奏。懿德皇后列廟在淑德皇后之上。臣不測升降。因由今有司。乃亂昭穆。是爲逆祀。臣等檢詳太平興國二年。宗正祠部行遣公牒。稱準敕。故越國夫人符氏。故夫人尹氏。並追冊皇后。敕差太常少卿張永錫撰定諡。故越國夫人諡爲懿德皇后。故夫人尹氏。諡爲淑德皇后。自來相承。以得元降敕命。所以未見先後因依。兼檢詳開寶九年。太祖山陵公文。稱孝明孝惠二后。祔廟敕文內故事。周世宗正惠宣懿二后。並先崩。正惠皇后元無位號。宣懿皇后則正居長秋之位。至世宗山陵。集官議定。以宣懿皇后配食。今太祖皇帝亦二后。議以孝明皇后曾正位中宮。

母儀天下。故以孝明皇后配食。在孝惠之上。今懿德淑德二后俱是追崇。卽未知次第明據。所云逆祀。亂昭穆。當司今詳自來。禘祫享薦。序昭穆。並以孝惠懿德淑德三后列于祖姑之下。卽未知懿德淑德二后孰爲昭孰爲穆。今趙安易所陳。乞裁自朝旨。敕令依舊懿德皇后在淑德皇后之上。禮閣新編至道三年六月。禮官言。太宗皇帝神主祔廟。淑德皇后尹氏。懿德皇后符氏。未知二后以何爲配。七月。詔命尙書都省集員外郎諸司四品已上官議。都省奏議曰。淑德皇后尹氏。生無位號。歿始追崇。況在初潛。已聞薨謝。惟懿德皇后符氏。享封大國。作配先朝。雖不及臨御之期。而夙彰賢懿之德。伏請以懿德皇后配。宗正卿趙安易言。今百僚議論。苟且墮瀆尊卑。若序以先後。當用淑德皇后配食。在懿德之上。詔有司詳討。以聞。禮官言。案太平興國中。進冊定諡。皆以懿德皇后居上。淳化元年。宗正少卿趙安易言。別廟祭享。懿德在淑德之上。臣未測升降之由。仍有司亂昭穆。爲逆祀。尋敕令依舊懿德在上。臣等又案江都集禮。晉景帝卽位。夏侯夫人應合追尊。散騎常侍任茂。傅玄等議云。夏侯夫人。初歸景帝。未有王化之兆。不及景帝統百揆而亡。后妃之化。未著遠近。追加尊號。無經義可據。臣等竊以今之所議。正與茂玄議同。且淑德合配之日。潛耀之符未兆。懿德輔佐之日。藩邸之位已隆。然未嘗正位中宮。母臨天下。豈可生無尊極之位。歿升配享之崇。于人情不安。于典籍無據。唐憲宗祔廟後二十五年。始以懿安皇后升配。順宗祔廟後十一年。始以莊憲皇后配食。今請虛位。允叶舊議。詔尙書省及禮官同詳定。上議云。竊以淑德皇后。生無位號。歿始追崇。況在初潛。已聞薨謝。懿德皇后。享封大國。作配先朝。雖不及臨御之期。但夙彰賢懿之美。若

以二后之內。則升祔當歸懿德。臣等又詳江都集禮。晉景帝卽位。任茂傳玄議。夏侯夫人。合應追尊。若此。懿德正其宜也。何哉。夏侯初歸景帝。未有王基之兆。不及景帝統百揆而亡。淑德始歸先帝。皇宋未有天下。是王基未兆也。洎先帝建節竟海。而淑德遽已薨謝。此不及統百揆而亡也。在懿德則不然。先帝初啓盤。惟尹正京邑。固已疏封越國。不得謂王基未兆。洎開晉邸。有內助之德。是及統百揆而亡也。又詳周世宗正惠宣懿配食故事。當時兵部尙書張昭。太常博士聶崇義同議。以正惠追尊位號。請以宣懿爲配。其時周朝以太后在位。疑宣懿祔廟之後。立忌非便。昭等引晉哀帝何太后在上。尊所生母周氏爲太妃。封其子爲琅琊王。及太妃薨。帝奔喪琅琊。第七月而葬。則奔喪行服。尙不以太后在上爲壓降。卽忌日廢務。于理無嫌。今禮官引唐順憲二帝廟享虛位之文。卽有追冊。二后虛位。未得爲安。伏請奉懿德神主升配太宗室。又案張昭等議。以周世宗神主無祔廟。必若宣懿同祔。卽正惠神主請加太字。仍舊別廟。合懿德皇后配食先帝。淑德爲皇太后。祀之別廟。詔曰。禮非天降地出。酌乎人情。都省以懿德皇后雖未正位中宮。亦合配享先帝。恭依所請。至于太者。尊極之稱。加于母后。施之宗廟。禮卽未安。淑德皇后不加太字。仍舊別廟祭享。十一月三日。帝率羣臣。自含光殿前導太宗皇帝神主。步出乾元門外。神主升輅。帝奉辭致奠。再拜涕泗嗚咽。命有司奉神主祔殿廟。以懿德皇后符氏配。百僚詣西上閣門進名奉慰。

元德皇后李氏太宗

國朝會要。至道三年十二月。太常禮院上言。準敕追尊故賢妃李氏爲皇太后。案周禮春官大司樂之職。